

11-րդ դարում: Նրան ծանոթ ամենահին օրինակը Հոռոմոսի վանքի ս. Հովհաննես եկեղեցու գավիթն է, որ ըստ արձանագրության կառուցված է 1038 թվականին Բագրատունի Հովհաննես Սմբատ թագավորի ձեռքով¹:

Հայոց միջնադարյան գավիթներն ու ժամատները հատուկ ուսումնասիրության նյութ դարձրած ճարտարապետության թեկնածու Ստ. Մնացականյանը ծանոթ է գավթի ավելի հին օրինակի, Գնդեվանքի գավթին Սյունիքում, որ կառուցված է 996 թվականին: Բայց, ինչպես հաղորդում է ինքը՝ ընկեր Ստ. Մնացականյանը, այդ, ինչպես նաև մյուս հին գավիթները (Քարկոփում, Վահանավանքում), ոչ թե հասարակական մեծ շինություններ են, այլ փոքրածավալ և դեռևս ճարտարապետական ուրույն ոճ շունեցող կառուցվածքներ²:

Ճարտ. Թ. Թորամանյանը գրում է, որ հայոց եկեղեցիների հետ կապված՝ գավթը բառը թեև շատ հին է, սակայն 10-րդ դարից առաջ այն նշանակությունը չուներ, ինչ որ 10-րդ դարից հետո: Հնում գավթը նշանակում էր եկեղեցու շուրջը պարփակող ընդարձակ բացօթյա շրջափակ³:

Սանահնի հնագույն գավիթը բացօթյա տարածություն չի եղել: Նրա դմբեթից կյուրիկե առաջինը մի շափավոր ջահ է կախել և ճարտ. Մնացականյանի նկարագրած փոքրիկ կառուցվածքը չի, այլ մեծ գահիճ, հասարակական շինություն, որ միաժամանակ ծառայել է վանքի երկու գլխավոր եկեղեցիներին:

Ճիշտ է Թորամանյանի այն եզրակացությունը, որ գավիթների հանրածանոթ ձևը զուտ հայկական ստեղծագործություն է, բոլորովին տարբեր արևմտյան եկեղեցիների porche կամ narthex կոչվող եկեղեցիներին կից շինություններից, բայց սխալ է այն տեսակետը, որ իրը թե այդ զուտ հայկական երևույթը ծագում է առել ոչ թե բուն Հայաստանում, այլ Կիլիկիայի կամ Փոքր Ասիայի հայերի մեջ և կամաց-կամաց տարածվելով հասել է Արևելյան Հայաստան, հավանորեն 11-րդ դարից առաջ:

Թորամանյանը կարծում է, որ Հոռոմոսի նախասրահը, որ կառուցված է Հովհաննես Սմբատի ձեռքով, այն էլ եկեղեցին շինելուց հետո, գավիթների հնագույն օրինակներից մեկն է և Բագրատունի թագավորների ժամանակ այդ սովորությունը գոյություն չի ունեցել⁴: Նրան թյուրիմացության մեջ է գցել Ներսես Լամբրոնացու «Մեկնութիւն ս. Պատարագին» գրքի մեջ եղած մի հատվածը, որտեղ ասված է՝

«Յարձանացեալ խորանացն որք կան մինչև ցայսօր հաստատուն, և ոչ ունին առընթեր ժամատուն... և թագաւորքն Բագրատունեաց, և որ առ նոքօք հայրապետք ընդ նույն գնացին շաւիղ՝ եկեղեցիս միայն շինեալ տունս աղօթից» (էջ 26):

Ճարտարապետական տեսակետով այնպիսի խոշոր երևույթ, ինչպիսին էր միջին դարերում եկեղեցիներին կից ժամատուն շինելը, պարզ է, որ չէր կարող բուն Հայաստանից անկախ Փոքր Ասիայում կամ թեկուզ Կիլիկյան Հայաստանում առաջ գալ և հետըզհետե տարածվելով հասնել Արևելյան Հայաստան, այն էլ այն ժամանակ, երբ Կիլիկիայում հայկական ճարտարապետությունը դեռևս չէր էլ հիմնադրվել և հիմնադրվելուց հետո էլ, 11-րդ դարի վերջերքում հագրվ էր իր գոյությունը պահպանում և հետզհետե ընկնում էր օտար ազդեցությունների տակ: Դրան հակառակ, Արևելյան Հայաստանում հենց Թորամանյանի ուսումնասիրությունների հիման վրա կարելի է պնդել, որ հայկական ճարտարապետությունը աննախընթաց խոշոր վերելք էր ապրում Բագրատունյաց և Արծրունյաց թագավորությունների սահմաններում, 10 և 11-րդ դարերում:

Այդ միջոցներին էր, որ կառուցվեցին այնպիսի աշխարհահռչակ ճարտարապետական կոթողներ, ինչպիսիք են՝ Անիի մայր տաճարն իր երկնասլաց երկկենտրոն կամարներով, Հոռոմոսի, Սանահնի, Հաղբատի վանքերը, Աղթամարի տաճարը, Անիի պարիսպները, կամուրջներ, բերդեր, հյուրանոցներ և այլն: Այդ ժամանակ էր, որ հայերն ունեցան Անիում և Վասպուրականում այն-

1 Թ. Թորամանյան, Նյութեր հայկական ճարտարապետության պատմության, հատ. Ա, 1942, երևան, էջ 156:

2 С. Х. Мнацаканян, Архитектура армянских притворов, Ереван, 1952, էջ 10:

3 Թ. Թորամանյան, հիշյալ աշխատությունը, էջ 163:

4 Թ. Թորամանյան, նույն տեղում, էջ 156: